



Niuspepa bilong ol Papua Niugini stret

Wantok

12t

DV
740
412139
10308-321



Poto - Peter Lowenstein

Aba i win

Piksa long pes 19-20

155000

Memba i tok

Mani Paul

Gavman bilong Somare i pinisim tru olgeta mani i stap insait long Viles Ekonomik Developmen Fan (VEDF). Nupela Minista bilong Komes Mista Opai Kunangel i tok.

Em i tok, nupela Gavman nau i no gat mani long givim i go aut long ol pipel long dispela yia 1980. Long dispela taim tu memba bilong Obura-Wonenera na wanpela memba bilong PPP, Mista Lennie Aparima i tok, ol mani i stap insait long Viles Ekonomik Developmen Fan (VEDF) i mas paul. Em i singautim Prais Minista, Sir Julius Chan long kirapim wanpela komiti long lukluk i go insait long we olpela Gavman i yusim dispela mani. Em i ting planti bilong dispela mani i mas paul long sampela hap.

Gavman bilong Somare i putim K750,000 (750 tausen kina) insait long dispela fan. Stat long las yia ol i wok long tilim i go aut long ol bisnis long ples na ol taun.

Mista Aparima i tok, komiti bilong VEDF i paulim planti mani tru na tu ol i save givim mani i go aut long ol sampela giaman bisnis. I no bisnis tru. Em i gat bisnis nem tasol. Ol i laik kisim mani tasol. Em i tok dispela komiti bilong painimaut moa long dispela mani i mas lukluk long dispela ol bisnis ol i kisim pinis mani long dispela fan.

Komiti i mas painimaut olsem dispela bisnis i gat nem long buk bilong gavman na husat i papa bilong bisnis. Mista Aparima i tok, em i laik save tu long wanem as tru na Is Sepik Provins i kisim planti mani long dispela fan. Na tu watpo Lus Developmen Koporesin i kisim K50,000.00 (fifti tausen kina) long dispela fan. Lus Koporesin em kampani bilong Sir Pita Lus.

VEDF i kirap long yia 1974. Gavman bilong Somare i kirapim long helpim ol

bisnis long ples i go het.

Sapos wanpela grup i gat 10-pela man na ol i laik kirapim bisnis ol i ken aplai i go long provinsal VEDF komiti bilong ol.

Ol bai salim dispela ripot i go long Nesenel VEDF komiti long Mosbi. Na ol i tok orait o no gat. Sapos ol i tok orait, dispela grup i ken kisim mani.

Long kibung bilong Palamen long las mun, olpela Minista bilong Komes, Mista Karl Stack i tokaut long Palamen olsem em bai givim aut

namba bilong mani bilong VEDF.

Long taim bilong Palamen long las mun Gavman i givim aut K750,000 (seven handet fifti tausen kina) long dispela fan i go long ol Memba bilong Palamen. Olsem bai ol i ken karim i go long ples bilong ol na givim aut long ol pipel.

Tasol long Mandé, Mas 24, Sekreteri bilong Depatmen ov Komes, Mista Wausi Wekena, i tok em i no laik tokaut long hamas mani ol wan wan provins i kisim pinis.

Ben Kasanda

Smatpela man i save baim sea long Invesmen Koporesen

Sapos yu laik save moa rait i kam long

Investment Corporation of Papua New Guinea

P. O. Box 155, Port Moresby.





NUPELA GAVMAN

Nupela Gavman kisim pinis ples bilong Gavman bilong Somare. Nupela lain man i wok nau long bosim kantri bilong yumi.

Taim nupela Praim Minista i makim pinis ol minista bilong em planti toktok i kamap. Planti man i laik mekim wok minista. Planti man i seksek long kamap bikman insait long gavman.

Tasol ol pipel i makim ol memba long kamap olsem maus bilong ol insait long Palamen. Ol i makim ol long kamap pesman bilong ol. Ol i no salim ol long kisim wok minista. Wok minista em i samting bilong helpim Praim Minista. I no samting bilong kisim nem o namba.

Minista i helpman bilong namba wan minista, Praim Minista. Minista i gat wok long sapotim na helpim Praim Minista. Tasol i luk olsem planti man i ting em i namba wan we tu long kisim nem na namba.

Kain tingting olsem i paulim wok bilong olupela minista planti taim. Kain tingting olsem i wok long pasim go het bilong yumi ol pipel. Kain tingting olsem i wok long daunim yumi olgeta man meri pikinini.

Olsem mipela hia long Wantok i ting moabeta yumi skelim gut ol wok bilong ol minista. I gat wok inap long 25 man olgeta o no gat. Bipo yumi no gat planti minista. Tasol long olgeta yia gavman i wok long suvim namba i go antap.

Nupela gavman i kamap na mipela i was. Sapos mipela lukim ol bikman bilong mipela i wok gut. Sapos mipela lukim ol i bihainim gut ol lo na wok bilong ol mipela ken bilip. Tasol sapos mipela lukim ol bikman i hambak, painim trabel long kot na seksek nabaut bai mipela no inap bilip.



**SI
PAK**

Kain pilai olsem yu lukim long dispela piksa i laik kamap nau long Ela Bis, Mosbi. Nem bilong dispela nupela samting, em Osinarium o 'Si Pak'.

Palamen i orait pinis long kisim sampela graun long Ela Bis na kirapim dispela wok.

Long dispela 'Si Pak' bai ol i wokim nupela bris. Na tu ol i laik wokim wanpela rum insait long wara. Long dispela rum bai yu inap sanap na lukim ol pis, na sak na rip.

Taim ol samting i redi pinis bai ol i karim olgeta pis, sak na dolpin i kam long ovasis kantri. Ol bai putim i go insait long 'Si Pak' na ol pipel i ken go lukim.

I gat sampela arapela samting tu ol i laik putim i go insait long dispela 'Si Pak'. Tasol Dipatmen bilong Turis i no laik tok aut long en.

Dipatmen bilong Turis i laik, bai dispela 'Si Pak' i pinis long mun Jun taim ol i opim Saut Pasifik Festival ov Ats. Tasol ol i no klia long tingting bilong nupela gavman long dispela wok. Bai wok i go het o no gat.

Long poto hia yu ken lukim ol pis ol i kolim dolpin i wok long kalap i go antap na kisim pis. Ol i kisim long han bilong trena taim em i singautim ol. Ol i kisim piksa hia long wanpela kain projek olsem long Amerika.

NIUS - NIUS - NIUS - NIUS - NIUS - NIUS

☆ **TURIS I NO PLANTI** - Namba bilong Turis i kam insait long PNG i go daun long yia 1980. Long mun Oktoba 1979 i gat 6,954 turis i kam long PNG. Tasol long mun Oktoba 1978 - 7,675 i kam.

☆ **PINISIM PLANTI BIA** - Long 1979 PNG i pinisim pinis moa long 61 milien lita bia. I olsem sapos olgeta man, meri, pikinini husat i stap insait long PNG i dringim 60 botol bia long 1979 yumi no inap pinisim ol dispela bia. Long wanpela lukluk raun long wanpela Gavman Komisn long 1974 ol i painimaut klostu 20 pesen long ol fotnait mani bilong ol wokman i go long baim dring tasol.

☆ **MORobe ILEKSEN** - Provinsal Gavman Ilekse long Morobe bai stat long 17 Me na pinis long 7, Jun. Ol tokaut long wanem ol lain man i winim ileksen long 19, Jun.

☆ **SKUL HOLIDE** - Olgeta skul long PNG bai kisim holide long namba 3 de bilong mun Julai. Long dispela de ol i ken malolo na go raun lukluk o stap insait long ol samting i kamap long dispela pestode ol i kolim Saut Pasifik Festival ov Ats. Saut Pasifik Festival ov Ats bai stat long namba 30 de bilong mun Jun i go inap long namba 12 de bilong mun Julai.


☆ **ENGA ILEKSEN** - Namba wan Provinsal Gavman Ilekse bilong Enga Provins bai kirap long Sarere namba 3 de bilong mun Me na bai pinis long Sarere 24.

TAMBU TORO

TORO WOK LONG KISIM OL POTO BILONG OL MAN NA OL GIJIM EM TUKINA.



NAU TUPELA MAN SPAK I KAM NA TOKIM TORO LONG KISIM POTO..



TAIM POTO I KAM AUT, EM I NOGUT NA BLAK OLGETA.



TUPELA BELHAT NA LAIK PAITIM TORO NA TORO PUTIM 60 STRET.



Tram Borneo Piksa Nau!

BORNEO PIKSA, em i namba wan ples bilong wasim piksa. Yupela salim ol Kala film wantaim blak/wait films, na kain kain eni film kam. BORNEO PIKSA, bai developim na prinim ol piksa, na salim i go bek long yupela wantaim nupela FRI FILM!

BORNEO PIKSA HELDSBACH
P.O. BOX 217 FINSHAFEN

WANTOK NIUSPEPA

Nius i kamap 52 taims long yia nau.

Opis bilong Edita na Edvetaising long P.N. G.
P.O. Box 1982, Boroko
Telipon: 25.2500 Teleks: NE 22213

Edvetaising long Australia
Central Media Sales, Sydney
Telipon: 436.1000 Teleks: AA23211

PE BILONG WANPELA YIA, 52 NIUSPEPA

Ples	Kam long balus	Long sip
Mosbi	K 10.00	K 10.00
P.N.G.	K 14.00	K 14.00
Australia	A\$ 36.00	A\$ 29.00
N.Z., Fiji		
Pasifik Ailan	NZ\$47.50	NZ\$ 32.00
USA, Yurop	US\$ 70.00	US\$ 47.00
	DM 120.00	DM 81.00
	L 31.00	L 21.00

CHAN TOKAUT

Nesanel Eksekutiv Kaunsil o Kabinet, em i wanpela liklik tim. Em i tim bilong ol memba bilong Nesanel Palamen. Ol man insait long tim ya i karim draipela hevi long mekim ol lo bilong lukautim olgeta wok na samting insait long kantri.

Kabinet em i no wanpela liklik palamen we yu inap painim ol man bilong olgeta provins i stap insait long en. Nogat.

Dispela, em i toktok bilong nupela Praim Minista, Sir Julius Chan. Em i bekim tok long ol pipel husat i tok nogut long em taim em i makim ol minista insait long nupela gavman bilong em. "Mi no givim ol wok minista nating nating long grisim ol pipel long sapotim mi", Sir Julius i tok.

Sampela pipel i wok long ting, we ol i makim ol nupela minista i no stret. Ol i stat mekim ol dispela toktok bihain tasol long taim Sir Julius wantaim Nesanel Alaiens bilong em i autim gavman bilong Somare. Ol i tok sampela provins i no gat nem insait long dispela nupela kabinet. Ol i tok kros tu long wanem sampela provins tu i gat ol minista husat i kisim ol liklik wok tasol.

Sir Julius i tok, ol i makim ol memba bilong Palamen husat i gat save long mekim wok. Na tu ol i skelim ol wok minista i go long ol politikal pati i stap insait long nupela gavman. Ol i no mekim nating nating olsem ol lain ya i wok long ting.

Taim em i tok aut long nupela Kabinet pinis, em i tok aut tu long we nupela gavman



bai ranim kantri.

Sir Julius i tok, namba wan samting ol bai mekim, em long kamapim gutpela sindaun namel long ol liklik pati insait long nupela gavman. Na tu ol bai traim kirapim gutpela sindaun namel long Pablik Sevis na Gavman. Na tu ol bai traim long kamapim gutpela sindaun namel long ol pipel bilong PNG na nupela gavman.

Sir Julius i tok ol bai traim klinim gut tru pipia olupela gavman i no bin lukim insait long gavman. Ol bai traim long katim daun kain slek pasin i stap nau insait long het bilong olgeta wokman. Em i tok as tingting tru bilong gavman bilong em, em long mekim ol pipel i bilip long gavman. Na tu long mekim olgeta pipel i harim tok na mekim gut wok bilong ol.

Na tu gavman bai stat long sekap long kain mani ol liklik man insait long pablik sevis i save kisim.

Sir Julius i tok, Gavman bai bosim gut tru we pablik sevis i save yusim mani. Na sapos wanem mani i stap ol bai putim i go long ol wok bilong helpim go het bilong kantri.

Em i tok tu olsem wok na olkain pasin bilong olgeta minista, em bai was gut tru long en. Em i no laikim ol mistek i kamap nabaut nabaut.

Sir Julius i tok, gavman bilong em i wok long wari tru long ol pipel husat i no gat planti samting. Ol i gat bikipela wari tu long planti ol manki husat i no kam insait long ol samting gavman i wok long givim long ol long kamapim go het bilong kantri.



OL LAIN BILONG CHAN

Lain I (L-R) J. Jamainan (Health Minista), G. Damena (Urban Development), G. Kwarara (National Planning & Development), R. Evara (Primary Industry), J. Chan, (PM), T. Lokoloko (Governor General), I. Okuk (Deputy Praim Minista), J. Momis (Decentralisation), N. Levi (Foreign Affairs & Trade).

Lain II J. Aoea (Forestry), J. Lemeki (Labor & Employment), O. Kunangel (Commerce & Industry), P. Torato (Justice), S. Tulo (Education), Clement Poiye (Media), G. Bakani (Minerals & Energy).

Lain III T. Kavali (Lands), W. Dutton (Police), Z. Zurenuoc (Home Affairs), G. Pepena (Defence), J. Kaputin (Finance), W. Korowi (Public Utilities), I. Kor (Environment & Conservation), M. Ipuya (Works & Supply), Akepa Miakwe (Liquor Licensing & Correctional Services), S. Tago (Science, Culture & Tourism).

Haiwe Draiva Paulim Mani

Dia Edita — Mi laik autim liklik wari bilong mi i go long Wantok Niuspepa. Wari bilong mi i go olsem. Hailans Haiwe draiva i go wok long ol kampani na kisim mani. Tasol ol save stilim mani bilong ol man long rot. Ol save kisim man hailans i kam long ka bilong ol. Ol draiva i save kosim pasindia long bikpela mani tru. Olsem K8 o K10.00 em olsem wanem. Ol draiva bilong haiwe. Haiwe em yu baim long mani bi-

long yu long husat man i ken draivim na karim kago i go i kam long rot.

Yu draiva bilong Haiwe yu nogat sem liklik long kisim mani bilong ol pasindia. Sapos yu man bai yu harim tok liklik. Ating yu no man. Lusim dispela kain pasin nogut. Mani yu kisim em bilong bia tasol, na amamas wantaim ol pasindia meri o tu kina bus meri. Em tasol liklik wari bilong mi. Sapos husat brata o susa i laik sapatim mi orait rait tasol i go long Wantok Niuspepa na mi ken lukim. Tenkyu tru.

Kipiye Peter, Simbu Provins.



Dia Edita — Mi laik lukluk bek long ol askim, Peter Hastings, wanpela niusman bilong Australia i bin mekim wantaim olpela Praim Minista, Mista Michael Somare long Wewak, i no longtaim i go pinis.

Sydney Morning Herald i bin putim kamap stori bilong ol dispela toktok namel long Mista Somare na Peter Hastings. Na liklik taim bihain tu, Post Courier i bin putim kamap wankain stori.

Dispela niusman i bin askim Mista Somare planti kwesten tru. Em askim Mista Somare long ol samting long kantri bilong yumi.

Wanpela kwesten em i askim, em long tingting bilong Mista

Mi Kristen

Somare long kristen pasin bilong kantri. Na Mista Somare em i tok pilai tasol long dispela niusman na i tok, "Jisas Pita, mi no wanpela kristen."

Dispela kain tok bek, em inap long mekim ol pipel i sanap na longlong long tingting tru bilong Mista Somare.

Planti pipel bilong ol viles nabaut, husat i save ritim Wantok Niuspepa, ol i kristen. Olsem na nau, mi laik mekim klia tingting tru bilong bikman bilong yumi.

Mista Somare i bin mekim tok pilai tasol i go long dispela niusman. Em i no bin ting dispela tok pilai bai kamap bikpela

samting tru long ol niuspepa. Long wanem, em i save dispela hap tok bilong em i tok pilai tasol. Em i no minim tok ya.

Tasol dispela niusman i ran hariap tru i go na raitim kamap wanpela stori na putim long niuspepa. Na em i no laik wet pastaim na painim as tru long dispela hap tok bilong Mista Somare.

Mista Somare em i bilip tru long wok developmen ol sios i wok long bringim kamap insait long PNG. Ol i wok long mekim bikpela wok tru.

Planti taim yumi save harim em long



Michael Somare

redio. Em i save tok, PNG em i wanpela kristen kantri. Na dispela kristen pasin, yumi mas bihainim i go long planti yia bihain. Ol dispela toktok, em i tru tingting bilong Mista Somare.

Mi ting dispela pas, em i stretim pinis ol toktok i bin kamap nabaut long ol niuspepa.

Oseah Philemon, Pres Sekreteri, bilong Michael Somare

Tambu Long Putim Han

Dia Edita — Yes, wari bilong mi i go olsem. Olsem wanem na plisman i putim lo long yumi olgeta man long i no ken putim han long dua bilong ka.

Orait yumi ol man nating i bihainim lo. Na ol wokman bilong gavman ol i save putim han long dua bilong ka. Bipo tru ol i bukim mi long taim mi putim han antap long dua bilong ka, na mi pe K5.00 pinis long plis.

Na sapos mi lukim wanpela plisman i wokim kain olsem bai mi kisim namba bilong ka na go long plis stesin. Bai mi askim ol long wanem na ol i tambuim yumi, na ol nogat.

Jethro David, Lae, Morobe Provins.

Salim ol pas i kam long:
WANTOK
BOX 1982
BOROKO



wanem em i no wari bilong mi tasol. Long pinisim pas bilong mi, mi tok. Nogut bos bilong Goroka Haus Piksa i lus tru long mani olsem na em sasim ol bebi tu.

Em tasol wari bilong mi, na sapos husat brata o susa em i sapatim mi o egensim mi orait, rait tasol i go long Wantok Niuspepa bai mi ken lukim.

L. Barnabas Kisiluk, Goroka. E.H.P.



Sem Long Toilet

Dia Edita — Yu inap givim mi liklik spes na bai mi autim liklik wari bilong mi?

Wanpela samting i no stret long mi lukim long ol toilet long planti taun olsem Mosbi, Lae na Goroka insait long PNG.

Mi save lukim planti kain piksa i no gutpela insait long toilet. Dispela ol toilet i no bilong ol PNG

tasol i save yusim. Dispela toilet i bilong ol ovasis man meri tu i save yusim.

Taim ol man i save rait long toilet ol samting nogut, em bringim bikpela sem long yumi PNG.

Maski wokim dispela kain hambak pasin. Dispela kain pasin em bilong pik na dok em ol i no gat tingting bilong ol.

Mi baim Wantok Niuspepa long mun Februeri na mi lukim wankain nius i kamap komplem long ol toilet.

Mi sapatim dispela stori i kamap long Wantok. Tasol husat i laik kros o husat i orait long dispela pas i ken rait tasol i go long Wantok Bai mi lukim. Tenkyu.

Lopie Meliki, Goroka, E.H.P.

Haus Piksa No Stret

Dia Edita — Plis inap yu givim liklik spes long autim liklik wari bilong mi. Wari bilong mi i go olsem.

Long Sarere namba 9 de bilong mun Februeri 1980, mi na famili bilong mi i go long piksa long Goroka Haus Piksa.

Mi gat tupela pikinini. Namba wan em boi na i gat 5-pela krismas bilong em. Namba tu em i meri

na i gat 2-pela krismas bilong em. Long Goroka ol bikpela man meri ol i baim long 80 toea, na pikinini 50 toea.

Oke, taim mipela go baim tiket bilong mi wantaim meri bilong mi na pikinini man na mipela laik go insait, ol man bilong kisim tiket, i tokim mipela long go stap autsait inap mipela baim tiket bilong

namba tu pikinini. Mi tok em i gat tupela krismas, tasol ol i strong yet. Tasol mi strong yet na mipela go insait long piksa.

Olsem na mi laik askim bos bilong Goroka Haus Piksa: Tu yia pikinini i dring susu yet, bai kisim mani we na baim piksa. Yu mas save olsem insait long tri minit o faiv minit bai pilai, pilai long susu na slip. Na mani bai lus nating. Em i no stret. Plis mi laik ol kaunsil mas lukluk long dispela samting. Na sapos bos bilong Goroka Haus Piksa em sasim man meri na ol pikinini, (bebi). Na rong bilong em, gutpela long rausim man ya o go long ples bilong em. Orait em i sasim ol wanskin bilong ol. Na tu ol man bilong wok long haus piksa mas lukluk gut long krismas bilong pikinini pastaim na sasim ol.

Na tu, smok pulap insait long haus piksa. Sampela taim piksa stop ating 10 minit o 15 minit orait bihain i stat gen. I no stret. Sapos yupela sasim piksa long bikpela mani, orait piksa no ken bagarap long namel. Piksa mas i go i go inap em yet i pinis.

Long Goroka yupela man na meri mas sapatim mi long toktok bilong mi. Long

MIPELA SAVE MEKIM OLKAIN WOK BILONG BENG

☆ Pas Buk

☆ Sek Buk


☆ Man i ken putim mani long beng na winim profit mani

☆ Sapos yu kisim narakain mani bilong wanpela arapela kantri, beng i ken senisim i kamap kina na toea.


☆ Ben i ken stretim olgeta tiket bilong yu, sapos yu laik go lukluk raun long arapela kantri.

Bank of New South Wales (PNG) Ltd.

Mipela amamas tru long helpim yu




Ol man meri bilong ples i kam lukluk raun long Mendi Handicrafts stua. Dispela stua i save salim ol samting bilong tumbuna, bilum basket ol i wokim long kanda na arapela samting bilong bilasim haus. Kain kain kaving tu i stap insait. Kas bilong Mendi.



Mendi Weaving i nem bilong dispela faktori long Mendi we ol i putim ol skin bilong sipsip long mekim kain samting olsem blanket, mat bilong flo, mat bilong slip ol klos bilong pasim kol na ol arapela samting. Dispela meri i putim i go insait ol longpela skin bilong sipsip ol i rolim olsem string long ol rop yu ken lukim na em i surukim i kam pas wantaim hap plang i stap klostu long han bilong em. Em nau taim em surukim i kam pas mat i kamap. Wanpela wanpela i kos samting olsem K40.00 i go antap. Sapos yu slip antap long wanpela mat olsem em bai swit tru na bai yu slip gut tru.

Mendi Go Het



Mendi em i biktaun bilong Sauten Hailans. Tasol sapos yu lukim Mosbi pinis bai yu ting Mendi i manki nating. Mendi taun em i inap olsem wanpela liklik ples long Mosbi olsem Gordons o 4 mail. Tasol Mendi i wok long gohet. Planti nupela haus i kirap pinis insait long taun na tu gavman i kirapim sampela nupela opis. Mendi Taun i slip namel stret long ol maunten. Maunten tasol i raunim taun. Long dispela samting tasol ples balus bilong Mendi i sotpela na ol F28 smok balus i no inap pundaun.

Mendi i save kisim ol kago i kam long Hagen long ol bikpela trak. Sapos yu sanap long bikrot bai yu lukim ol bikpela trak i kam i go long bringim kago i kam long Mendi.

Mendi Taun i no gat planti pablik hotel olsem ol arapela taun. I gat wanpela hotel tasol na ol i kolim Mendi Hotel. Long dispela hotel ol turis i save kam slip na kai-kai. Ol man bilong ples i no save go long hotel. Ol sampela wokman bilong gavman na bisnis husat i save wok long Mendi

taun i save i go dring na kaikai long dispela hotel.

Mendi Hai skul i stap insait long taun. Woks na Saplai dipatmen i kirapim tu wanpela skul bilong lainim ol nes. Dispela skul i kos moa long K115,000 (wan handet fiftin tausen kina).

Mendi Taun i gat wanpela bikpela stua tasol, Steamsips Tretting Kampani. Olgeta arapela i liklik stua bilong ol bisnisman bilong Mendi. Mendi tu i gat sampela faktori. Ol kain

faktori bilong wokim ol klos i save pasim kol. Na tu ol mat na ol samting olsem bilong putim long bed na slip.

Ol i gat ol stua tu bilong salim ol samting bilong tumbuna. Planti turis na visita husat i save go long Mendi i go pastaim long dispela ol stua.

Redio Sauten Hailans, nek bilong Muruk tu i stap insait long Mendi taun.

Redio stesin i helpim planti man meri husat i stap insait long bus tru. I no gat




planti ol gutpela rot long provins olsem toksave progrem na ol arapela progrem i moa gut long helpim ol pipel save long ol kain kain samting i kamap long provins.

Planti ol sab distrik long Sauten Hailans i sindaun tasol long bun bilong ol liklik balus. Ol balus tasol i save karim ol saplai i go long ol. Tumbuna pasin i strong yet long Sauten Hailans.

● Ben Kasanda





Tupela poto i soim ol man i wok sensus. Long raithan ol i redi long go long ol ailan klostu long Madang. Long lephan sensus woka i kisim ol toktok long wanpela man. I gat 10-pela askim olgeta bai ol i askim yumi long taim bilong sensus.

Madang Sensus

Madang Provins pinisim pinis wok sensus. Madang i go pas long olgeta arapela provins long dispela bikpela wok.

Long Madang Provins, ol sumatin, skul tisa, na ol yangpela pipel husat i bin lusim skul i helpim ol wokman bilong Provinsal Sensus Opis long mekim dispela wok insait long dispela mun. Mista Mal Thompson, husat i go pas long dispela wok i tok olsem opis bilong

em i amamas tru long we ol dispela lain pipel i bin wok.

Long taim ol i bin mekim ol dispela wok bilong kaunim ol pipel ol dispela lain i bin raun long olgeta hap bilong provins. Sampela ol i ran long ol bas na ka. Ol arapela i ran long bot, na

balus, na sampela ol i wokabaut long lek.


Na tu long dispela sensus long Madang, ol i traim lukim sapos ol plen bilong mekim dispela wok bai i gutpela long bihainim o nogat. Bikpela sensus bai kamap long mun Oktoba long dispela yia.



Sensus woka kisim toktok long wanpela meri. Dispela siot ol sensus yet i wokim long toksave long ol man bai wok sensus i gohet nau.




COLGATE I SAVE STRONGIM TIT BILONG YU




Olgeta de long moningtaim na long apinun yu mas klinim tit bilong yu. Yu mas mekim olsem:

- 1 Putim liklik gris bilong klinim tit antap long liklik brum bilong klinim tit.
 - 2 Sapos yu laik bai tit bilong yu i waitpela tru na i strongpela, yu mas klinim tit bilong yu bihain long olgeta bikpela kaikai. Putim liklik brum antap long tit na pulim em i go antap na i kam daun gen, planti taim.
 - 3 Nau klinim ol sap bilong tit.
 - 4 Yu mas klinim tu baksait bilong tit.
 - 5 Taim yu klinim tit, yu mas krungutim tru dispela liklik brum, bai em inap klinim olgeta liklik spes namel long ol tit na rausim ol pipia kaikai long en. Pipia kaikai i mekim tit i sting na i gat hul.
- Dispela em i pasin tru bilong klinim tit. Na sapos yu bihainim tru, bai tit bilong yu i klin na i waitpela na tit na maus bilong yu i no ken sting.

Bilong strongim tit, yu mas dringim plantim susu, na kaikai ol samting i gat vitamin na gutpela marasin long en.



SUSU i gat kalsium na fosforus—em tupela samting i save strongim skin bilong tit. Na tu i gat vitamin A, B, C, na D.



KIAU i gat kalsium, fosforus na vitamin A, B, na D.



OLKAIN PRUT i gat vitamin A na C.



MIT i gat fosforus na vitamin B.




OLKAIN SAYOR i gat vitamin A na C.




PIS i gat fosforus na vitamin B.


Sapos yu no lukautim gut tit bilong yu, bai ol i bagarap olsem:




GUTPELA TIT
1 Skin
2 Bun
3 Rop



LUKAUT
Wanpela liklik hul i bin kamap long skin bilong tit na skin i stat long sting. Go hariap long dentis (doka tit).



WARI
Lukaut, nau hul i bin kamap inap long bun bilong tit. Nau yu save pilim liklik pen Hariap Go lukim dentis.



PEN
Hul i kamap pinis long rop. Nau bikpela pen moa i kamap. Nau yu mas go lukim dentis.

Yu mas kaikai mit wantaim sayor bilong kisim vitamin A, B, na C.

Lukaut: planti switpela kaikai na loli i save bagarapim tit hariap.

Colgate gris bilong tit em i swit moa, na i mekim tit bilong yu i waitpela na i strong.



Tok save i kam long Colgate Palmolive bilong helpim helt bilong tit.

Presiden Painim Trabel

Insait long Filipins, gavman bilong Presiden Marcos i wok long painim planti wari nau. Planti man insait long gavman bilong Amerika i pilim olsem sapos ol i no stopim hariap ol dispela wari, bai Filipins i painim kain trabel olsem kantri Iran i painim pinis.

As bilong ol wari insait long kantri em long tupela samting. Namba wan samting em long sindaun bilong ol pipel. Planti bilong ol pipel i no gat gutpela sindaun bilong ol. Dispela wari i nogut tru insait long Manila, biktaun bilong Filipins. Ples, ol pipel i stap long en, i nogut tru. Na em i

winim ol ples skwata bilong ol arapela kantri insait long Saut Is Esia. Planti bilong ol dispela pipel i no gat wok. Ol i save raun tasol insait long siti na askim ol pipel long kaikai na mani.

Namba tu samting i wok long bagarapim gavman bilong kantri em hia— prais bilong

ol samting i wok long suruk i go antap. Prais bilong petrol na rais i go antap tru.

Bisnis bilong kantri tu i wok long bagarap. Long dispela taim gavman bilong kantri i gat bikpela dinau tru long bekim.

Ol trabel namel long ol pipel husat i



no laikim gavman bilong Marcos tu i wok long kamapim wari insait long kantri. Presiden Marcos i wok long salim ol lain soldia bilong em i go long ol dispela hap long stopim ol trabel. Planti ol pipel i kisim bagarap, na sampela i dai pinis.

Gemini Nius



IN MEMORIAM

THE INDONESIAN
EMBASSY CONVEYS
ITS APPRECIATION FOR
THOSE WHO EXTENDED THE
MESSAGES AND FILLED IN A
CONDOLENCE BOOK EXPRESSING
THEIR CONDOLENCES REGARDING
THE PASSING AWAY OF

DR MOHAMMAD HATTA

INDONESIAN
FIRST VICE PRESIDENT,
CO-PROCLAMATOR OF
INDONESIA'S INDEPENDENCE,
FREEDOM FIGHTER AND NATIONAL
LEADER



SUMITOMO



Askim
mipela
long
strongpela
taia tru

Lankrusa
Dyna na
Stout Taia

SL 803

DUNLOP
Aircorps Rd, Lae
42-1322

Air Niugini helpim go het bilong Kantri



**FAST
COMMUNICATION**

AIR NIUGINI 



Poto (L-R) Enny Moitz, Morobe Provinsal Minista bilong Hom Afeas, sanap wantaim Misis Maisie, Presiden bilong Morobe Wimens Asosiesen wantaim pikinini bilong em na wanpela memba bilong asosiesen. Ol i sanap autsait long nupela stua bilong ol.



Ol sampela meri husat i memba pinis long asosiesen i sanap klostu long nupela stua bilong ol. Long dispela stua ol i salim ol samting ol i samapim pinis. Ol i painim liklik mani long raunim wok bilong ol.

Morobe Wimens Klab

Ol memba bilong Morobe Provinsal Wimens Asosiesen, em ol lain meri bilong taun tasol. Ol i laik wok helpim ol meri long taun na long ol setelmen tu. Tasol ol i save laik helpim tu ol meri bilong ples autsait long taun, olsem Wau na Bulolo.

Presiden bilong Wapela wok dis-Asosiesen, em i Misis pela Asosiesen i wok Funke Samana. Em i long mekim, em long meri Finschafen. Em raunim ol setelmen i tok, ol meri kamapim dispela Asosiesen, ol i bilong ol sios grup, gavman dipatmen, ol kain kain grup na ol meri nabaut husat i laik join.

Ol i kisim wan mun long stap skulim

ol meri bilong wanpela setelmen. Bihain orait, bai ol muv i go long arapela setelmen gen. Sampela taim ol i save kisim ol save-man long wanpela wok long go helpim ol.

Ol i skulim ol meri bilong ol setelmen tu long wanem kain samting Gavman i gat we ol i ken kisim helpim. Em ol samting olsem Welfea Dipat-



men na arapela samting.

Asosiesen i askim pinis Provinsal Gavman long helpim em long sampela mani. Ol i laik yusim moa mani long givim moa skul i go long ol meri.

E. Paine



FANTA

TRADE MARK REGD

IT'S A BOTTLE OF FUN



BANANA PORIS

(Gutpela Long Givim Pikinini)

Ol samting yu mas i gat:

1. Wanpela mau banana. (Wilwilim gut)
2. Wanpela tebolspun tapiok (skrapim pinis.)
3. Wanpela tebolspun suga.
4. Wanpela kap suga.

We bilong mekim:

1. Miksim tapiok wantaim liklik susu.
2. Hatim arapela susu long wanpela sospen. Kapsaitim tapiok i go long en. Yusim wanpela spun long tanim taim sospen i stap antap yet long stov. Larim i stap long stov inap em i boil olsem 3 minit; orait rausim long stov.
3. Putim mau banana i go long en.
4. Taim bilong kaikai, putim liklik susu i go long en.

Miting long India

Papua Niugini i bin stap insait long wanpela bikpela kibung bilong ol meri long India. Dispela kibung i bin kamap long Dehli, biktaun bilong India.

Mis Selecia Dobunaba bilong Nesenel Plening Opis na Misis Raka Launch, Presiden bilong Y.W.C.A. long Lae i go long dispela kibung.

Insait long dispela kibung, ol meri husat

i bin makim Papua Niugini i bin givim wanpela ripot long we ol meri insait long kantri bilong yumi i sindaun. Opis bilong Home Afeas na Nesenel Plening Opis i bin wokim sampela bilong ol dispela ripot ol meri i karim. Wanpela samting ol i bin toktok long en, em long ol kain wok ol meri insait long Papua Niugini i save mekim.


Long wanpela ripot ol i tok, ol wok insait long gavman na ol bisnis, i no gat planti meri. Dispela long wanem planti bilong ol dispela wok em ol man i holim. Long pablik sevis, i no gat planti meri i holim ol bikpela wok.

Ol tupela wok we planti meri i stap insait long en, em wok tisa na wok nes. Namba bilong ol meri i holim dispela tupela wok i winim ol man.

SINGER



PREN BILONG YU INAP OLTAIM



**MORTEIN
TASOL I KEN
KILIM OL
BINATANG
KWIKTAIM**

Helpim Manki

Insait long Mosbi i gat wanpela haus bilong helpim ol pikinini husat i no kamap gut. Ol kain pikinini olsem, lek i dai, yau i pas, ol dispela husat i longlong, ol papamama i ken putim ol long dispela hap.

Wanpela lain Bruder bilong Katolik Sios ol i lukautim dispela haus. Em ol Bruder bilong Sen John ov God. Bruder Michael Davis i go pas long dispela skul. I gat 5-pela meri i wok wantaim em long lukautim ol dispela pikinini.

I gat 11-pela pikinini i stap nau

long dispela skul. Tri-pela bilong ol tasol i save skul long moning. Em ol dispela pikinini i orait liklik. Ol i ken harim tok liklik na mekim samting ol tisa bilong ol i tokim ol long mekim. Tasol ol arapela 9-pela i no gutpela tumas. Ol i no inap skul.

Ol tripela pikinini husat i save skul long



Joseph Poraki

moning em long Joseph Poraki, wanpela manki long hap, bilong Madang, Andrew Au bilong Kairuku na wanpela meri, Rosemary Unami, bilong Sauten Hailans.

long wanem em i ken toktok na yau bilong em i orait. Tasol em i no inap long sanap. Tupela lek bilong em i dai. Tasol em i ken wokabout long han bilong em.



Andrew, i no inap long holim samting long han bilong em. Long taim bilong rait, em i save rait long lek bilong em. Em i save holim chalk long rait lek bilong em na rait long liklik blekbod. Tupela yau bilong em na maus bilong em i pas. Olsem na long taim bilong skul, tisa bilong em i save putim wanpela kain samting bilong harim long yau na ol i save tokim em long wanem samting ol i laik bai em i mekim. Em i smat long holim chalk long lek bilong em.

Dispela skul, ol i bin kirapim long 1969. Na mani bilong helpim wok bilong skul i kam long ol kain lain olsem Ret Kros o ol arapela lain olsem, husat i laik helpim ol dispela pikinini. Sampela taim ol pipel insait long siti i save go helpim ol meri long lukautim ol dispela pikinini. Wanpela bilong ol em long Mis Lucy Pondeira bilong Manus. Lucy i bin wok long dispela ples inap 7-pela yia nau. Em i tok long Sarere o Sande ol Sista na Bruder long Bomana i save kam kisim ol pikinini i go raun long ol nambis long Mosbi. ● Anna Rongap

Long ol dispela tripela pikinini, manki Madang ya, Joseph i smat moa. Dispela

Tisa i helpim Andrew long rait wantaim sok.



Nupela Bikman Bilong Kot

Judisal na Legal Komisin i makim tripela nupela man long sanap mekim ol bikpela wok bilong kot. Ol i makim ol dispela man long Fonde 13 Mas.

Namba wan man, em i, Charles Maino Aoa. Ol i makim em long holim wok olsem, Pablik Prosekyuta bilong PNG. Em i man husat i bosim ol loya bilong gavman. Dispela man, em i namba wan PNG loya long kisim dispela wok.

Mista Maino i skul long Yunivesiti ov PNG. Long 1972, em i pinis na kisim digri pepa bilong em long lo. Em i wok wantaim gavman olsem Stet Solisita inap long tripela yia. Na long 1979, em i mekim wok olsem Pablik Prosekyuta. Em i kisim ples tasol bilong Mista Kevin Egan, husat i go bek long kantri bilong em las yia.

"Dispela wok bai hat tru. Tasol em i orait. Long wanem mi laikim senis tu," Mista Maino i tok. Na em i ting, dispela wok i no narakain olgeta long wok em i mekim pastaim olsem Stet Solisita. Em i tok, em i save pinis long ol wari bilong dispela wok.

Na em i sambai tasol long daunim ol wari ya.

Mista Maino i bin stap insait tu long ol toktok bilong stretim bruklus tingting bilong Bouganville. Em wantaim ol arapela lain i stap givim pasin bilong lo long Gavman. Ol toktok ya i bin kamap long 1975-76.

Em i bilong Inawi viles insait long Sentral Provins. Em i marit na i gat 4-pela pikinini.

Namba tu man, em i Joseph Aisa. Ol i makim em nau long wok olsem Sif Majistret bilong PNG. Em bai stat mekim wok long Epril 1.

Long 1966 em i pinisim skul bilong em long Administretiv Koles. Em i kisim pepa bilong skul bilong en, na i stat wok olsem majistret. Em i wok long Madang na Isten Hailans na Milne Be na Nesenel Kapital Distrik tu.

Mista Aisa i tok, wok bilong Sif Majistret, em i bikpela tru.

Wok bilong Mista Aisa, em long lukautim ol kot olsem, Distrik Kot, Viles Kot na Land Kot insait long PNG.

Mista Aisa i kisim tu, lo digri long Yunivesiti ov PNG. Em i gat 39 krismas. Em i marit na i gat 6-pela pikinini.

Em i bilong Beipa'a viles long Berena insait long Sentral Provins.

Namba tri man, em i Mista Jeffrey Allan Miles. Em i kisim pinis wok olsem jas bilong Nesenel Kot bilong PNG.

Em i wok inap 20 yia olgeta long Niu Saut Wales, Australia.

Mista Miles i bin wok inap tupela yia tu long helpim ol blakman bilong Australia.

Bipo ol i makim em long kisim dispela wok, em i wok olsem Pablik Difenda long Niu Saut Wales, Australia.

Em i gat 45 krismas. Em i marit na i gat tupela pikinini.



Mista Charles Maino



Mista Joseph Aisa.

WAIGANI KAS

Planti pipel bilong ol arapela hap bilong Papua Niugini i save tok bilas long Mosbi. Ol i save tok olsem Mosbi i ples drai. Yu no inap long lukim ol kain samting olsem ol pato o ol bikpela wara klostu long siti.


Tasol dispela i no tru. Baksait tasol long ol maunten long Waigani i gat wanpela bikpela raun wara i stap. Dispela raun wara ol i kolim Waigani Tais. Na em i luk olsem wanpela raun wara long hap bilong Sepik. Long dispela raun wara i gat ol ol wel pato, na ol liklik pisin bilong ol raun wara. Insait tu long wara i gat ol pukpuk i stap.

Sampela pipel long Mosbi i save go painim ol pis long dispela wara na karim i go salim long maket. Dispela ol pis ol i kolim makau. Miria Kore em wanpela bilong ol dispela pipel. Miria i stap long Morata Setelmen i no longwe long dispela raun wara. Olgeta moning em i save kisim umben bilong em na kam putim long wara. Em i save pul long liklik kanu bilong em na raunim ol pis i go insait long umben. Miria i bin lusim ples bilong em long Galp Provins na kam long Mosbi long 1974. Pastaim em i wok long wanpela petrol stesin. Tasol em i lusim dispela wok na nau em i save painim pis tasol long dispela wara na salim long maket.

Miria i tok, "Mi laikim dispela wok long wanem dispela raun wara i olsem long ples bilong mi. Na tu mi save mekim gutpela bisnis long ol pis mi salim long maket. Mi no marit olsem na mani mi kisim inap long lukautim skin bilong mi."

Long maket insait long siti ol i save slaim ol dispela pis olsem tupela o tripela long K1.00.

Dispela raun wara i pulap tru long ol wel pato, tasol ol pipel long siti i wok long sutim ol long masket, na nau i no gat planti tumas i stap.



Mista Miria Kore long Waigani Tais. Ol makau i pulap long kanu bilong em.



Hia meri i salim long Gordons Maket. Ol salim long 50toea 50 toea.

MOA

LONG MONI BILONG YU

Nupela!



TRAKA I WOKIM GUT OLGETA SAMTING

Wantaim 1166cc ensin,
Traka i gut tru long draivim
na em i gat strong long go antap
long ol maunten na long rot i nogat kolta.
Yu inap foldim ol sit sapos yu laik karim
kago long baksait.
Gutpela Toyota mechanical parts i givim gutpela wok.
Tasol bai yu mas kisim spares tu
sapos yu laikim.
TRAKA i wok tupela wei na i gutpela transport
bilong ologeta wantaim prais ino dia tumas.
Go lukim ol - Draivim ol nau long ELA MOTORS.



TOYOTA
TRAKA



ELA MOTORS

A Member of Burns Philp Group

YU ASK LONG EN. YU KEN KISIM

TOYOTA

Bikpela WinMani

Ol man husat i baim sea insait long Invesmen Koporesen bai kisim 18t long wan wan sea. Na tu em bai kisim wanpela fri sea long olgeta tupela sea em i holim pinis.

Invesmen Koporesen i givim 1 milien kina olgeta i go long ol pipel olsem dividen o winmani. I luk olsem ol man kisim 13 pesen winmani. Samting olsem 8,000 man meri na bisnis grup i holim sea insait long Invesmen Koporesen.

50 sea fri. Em yu kisim 1 sea nating long olgeta 2-pela sea yu holim pinis.

Pangu Man Winim Ileksen

Wanpela kendidet bilong Pangu Pati i bin winim pinis sit bilong Kompam-Ambum insait long Enga Provins.

Sapos yu baim wan handet sea nau bai yu kisim nating narapela



PABLIK NOTIS

POT MOSBI SITI KAUNSI BAI LEKSEN
WOD 9 NA WOD 6.

OLGETA PIPEL HUSAT INAP LONG
VOT LONG DISPELA OL WOD, HARIM.

- Mipela i salim aut pinis tok save pepa bilong opim bai ileksen long 18 Mas, 1980.
- Yu inap makim man bilong sanap resis long bai ileksen, stat long 18 Mas, 1980. Na dispela bai go inap namba 2 de bilong mun Epril 1980.
- Ileksen tru bai kamap long 26 de bilong mun Epril 1980. Em bai wan de ileksen tasol.
- Mipela bai kisim bek toksave pepa bilong opim ileksen, long Fraide, 9 Me, 1980.

Husat i laik sanap resis long ol dispela bai ileksen, em i mas givim nem long man bilong bosim dispela ileksen long Iektoral Komisin het opis long Boroko.

Yu inap sanap resis long dispela bai ileksen, sapos nem bilong yu i stap long rolbuk bilong dispela wod. Sapos nem bilong yu i no stap long rolbuk, sori tumas. Mipela i no inap larim yu sanap resis.

MALEWA KONE,
Man bilong bosim ol dispela bai ileksen.



INDEPENDEN GAVMAN BILONG PAPUA
NIUGINI

Provinsal Gavman spesel lo bilong 1979 bilong bosim ileksen bilong Simbu Provinsal Gavman.

WOK BILONG TEKEWE OPISA BILONG
BOSIM ILEKSEN NA MAKIM NUPELA

KOMISIN BILONG BOSIM OL ILEKSEN, long strong bilong pawa em i kisim long Provinsal Gavman spesel lo na long olgeta arapela pawa, em i laik tekewe toksave bilong opisa bilong bosim ileksen. Dispela toksave em i bin raitim long 19 Jun, 1979 na i bin kamap long Nesenel Gaset namba G.41 long 28 Jun, 1979. Nau em i laik makim STONNY NUNA long lukautim olgeta ilektoret insait long Simbu Provins.

Mi raitim dispela toksave long 7 de bilong Mas, 1980.

N.G. McNAMARA,
Namba tu komisina bilong bosim ol ileksen.

Soim Olgeta Ril Bilong

Dia Edita — Inap pas long piksa o yu putim pas bilong mi insait long Wantok Niuspepa. Yes wari bilong mi go olsem:

Mi no save amamas long ol piksa ol i save soim long Arawa Fementri. Long wanem i no save i gat The End long en. Mi save lukim piksa long olgeta hap. Na long pinis bilong ol i save gat The End, Mein Karekta o man i go



Yupela ol man-meri husat i save go lukim piksa i save lukim dispela sain The End, taim, piksa i pinis. Sapos dispela i no kam em yupela i save olsem i gat wanpela ril i stap yet. Em dispela kain pasin em ol pipel i soim piksa long Arawa Fementri i save mekim.

Mi laik tok olsem, plis yupela mas soim olgeta hap bilong piksa long Arawa Fementri. Long wanem i no

Piksa

gutpela long ol man na meri i lusim nating K1.00 bilong ol na lukim tasol hap piksa, na larim 2-pela o wanpela ril i stap.

Husat man long dispela piksa, ol brata na susa i laik egensim mi o sapatim mi, rait tasol i go long Wantok Niuspepa na bai mi inap long lukim. Tenkyu.

Philip Sigai,
Arawa. N.S.P.

Pos Opis Man Opim Pasol

Dia Edita — Inap yu givim mi liklik spes long autim wari bilong mi. Wari bilong mi olsem:

Mi bin odaim sampela buk bilong lotu i kam long Amerika na Australia. Taim ol i salim i kam long Papua Niugini, ol lain long Pos Opis i bin brukim ol dispela pasol na sekim ol buk

Salim ol pas
i kam long:

WANTOK
BOX 1982
BOROKO

bilong mi. Orait biha-in ol i salim ol dispela buk wantaim brukbruk pasol i kam long mi.

Ating dispela pasin i no stret long wanem em i tambu tru long opim ol pasol bilong arapela man o meri. Long wanem em i pesenel, bilong wanpela man tasol. Em i no pablik, bilong olgeta man.

Na tu mi laik tokaut, husat i givim dispela peson o husat tru i putim dispela long opim ol pasol i kam long ovasis kantri. Sapos gavman i

putim lo, orait wanem kain gavman nau yumi gat, komunis o demokretik gavman. Sapos demokretik, orait bilong wanem ol i putim dispela lo. Em i fri kantri, long olgeta samting. Yu ken wokim wanem samting yu laik.

Em i no komunis kantri we olgeta samting em bilong olgeta man. Yu mas tingim gut. Em pasin bilong stil tu, na sapos yu opim dispela pasol na yu painim wanpela samting we yu gat bikpela laik tru long en, yu ken temptet long stilim, oke.

Na mi laik tok gen olsem, sapos mi lukim gen wanpela pasol i op, bai mi bagarapim wanpela pos opis stret. Bai mi brukim ol samting stap long pos opis olsem ol boks namba bilong kamautim ol pas na pasol. Em tasol liklik wari bilong mi.

Kadawar Nat,
Lae. Morobe Provins.



MASIN BILONG MEKIM YU FRI

*Ples bilong yu i gat trabel long painim wara?
Yu gat wari long pawa?*

YES


Orait, yu kam long Steamships Machinery na toktok wantaim ol man i save tumas long ol PAWA ENSIN na WARAPAM ENSIN.

Ol ensin hia yu ken karim i go wantaim yu.

HONDA em i ansa bilong yu.

OL HONDA MASIN I MEKIM YU FRI.

HONDA®



HEBAMO 123

Port Moresby 25 9066
Rabaul 92 1400

and HONDA
dealers

Madang 82 2055
Goroka 72 1488
Lae 42 4799

Maski Baim

Meri Long Tausen

Dia Edita — Inap long yu givim mi spes, bai mi ken bekim tok bilong wantok ya, Bena Linafana bilong Goroka long Wantok Niuspepa namba 298.

Yes wantok, yu bin askim ol kwesten long ol man i save komplek long we bilong baim meri. Namba wan kwesten bilong yu em long radio. Em mi ken bekim na tokim yu olsem, em ol save man bilong graun i wokim long faktori. Na tu ol i wankain long trak na motobaik. Na ol kain kain samting yu save lukim long stua.

Wantok, inap long yu tokim mi ol dispela ain, kopa, na

ol arapela minerals ol i save kisim long wanem hap? Sapos yu ting ol i kisim long aninit long graun, orait, yu save em i kos moa long setim ol mesin long digim ol dispela samting aut. Na ol samting olsem kaikai, em hatwok bilong ol man na kaikai i save kamap. Olsem na yumi mas baim na kaikai. Em ol i go long stua tu i wankain.

Tasol ol pikinini meri bilong yumi, yumi no ken kos tumas long ol man i ken baim. Em yumi i no wokim long faktori o long han. Em bikpela marimari i kam long God. Bipo God i wokim Adam, orait bihain em i wokim

Eva. Na taim em i wokim Eva pinis, em i no tokim Adam long baim em long 5 o 6 tausen kina. Nogat.

Olsem na yu mas tingim wantok. God i no wokim pikinini meri bilong yumi bilong salim na kisim bikpela mani olsem tausen. Nogat. Sapos yu ting yu hatwok long was long em taim em i liklik yet, orait yu mas kisim liklik presen long man. Em tasol. Yu no ken kolim tausen. Tausen em yumi olgeta save brukim bun long painim ya. Em i no isi wok.

Paul Tarry Kasirov,
Bogia.
Madang Provins.

Toktok I No Stret

Dia Edita — Mi wanpela hetman bilong Butibam Viles klostu long Lae, i laik bekim tok bilong Pater Frank Mihalic kamap long Sarere Mas 1980.

1. Mi bin stap namel long ol papa bilong graun na skwata inap planti yia pinis. Tasol mi no bin harim liklik tok bilong ol skwata i lusim K20,000 (20 tausen kina) long baim graun.

2. Pater Mihalic i tok, ol dispela lain i baim pinis graun long papa bilong graun. Mi luk save, hau ol i baim na wanem taim. Husat tru kisim mani. Husat lain witnes

long en, taim ol i baim.

3. Pater Mihalic, sapos yu lisim graun long gavman inap long 20 yias, i no 90 yias, em i soim olsem yu baim graun pinis o yu lisim tasol?

4. Dispela nius bilong yu i no stret long tingting bilong mi na ol papa bilong graun tu.

Dispela kain pasin kamap long niuspepa i tok, baim graun i no gutpela tumas. Bikos baim graun i min narakain long lisim. Sapos mi sindaun long graun bilong yu na lisim o baim long wan wan

yia long sindaun inap long 10 o 15 yias, em i olsem mi baim graun na i kamap graun bilong mi olgeta? Ating nogat.

Ating long kain tok olsem, moabeta sekim olupela sait pastaim orait raitim long nius. Nogut kirapim bel kros long arapela sait nating. Em tasol.

M. Gware (Presiden)
Butibam Progres Aso-siesen, Lae.



KAUNSI LA TRAIM



HEY, OL WANTOK.....
MDSKI TOKTOK NA
MAUSWARA PLANTI.
EM I NO SAVE MEKIM
SAMTING KAMAP.
YU MAS GO TRAIM NA
MEKIM.

SOLIM PIS NA DRAIM
PIS



DISPELA HAUS BILONG
BRIAM KAIKAI, KMI
GUTPELA, TRAIM, MI
LUKIM SAMPELA MERI
I DRAIM PIS TU.

YUMI MAS
ASKIM OL LONG
SOIM YUMI WE
BILONG DRAIM
PIS.



NEKSDK... KASIM OL
AI BILONG BOTOL
NA NILIM LONG HAP
PLANG. YUSIM DISPELA
LONG RAUSIM KRILE
BILONG PIS.

EM NAMBA
WAN AIDIA.



BINAIN KATIM HET
BILONG PIS. ORAIT,
NAU KISIM NAIP
NA KATIM MIT
LONG TUPELA
SAIT WANTRAIM.



MERI YA
MEKIM WANEM?

KM PUTIM MIT
LONG SOLWARA.
OLSEM BAI MIT
I KLIN NA STAP
LONG TRAIM



KASIM KLIN HA
GAREN DRAM
NA PUT SOL INSAIT
PAS NA PIS ANTAP
OLSEM HIA....

GUTPELA
TRU!



WANEM TAIM
BAI RAUSIM
MIT LONG
SOLDRAM?

SAMTING OLSEM
4-PELA BE. SAPOS
BIKPELA PIS TRU,
ORAIT LARIM, LONG
TRAIM LIKLIK.
PUTIM HEVI
SAMTING LONG
DAUNIM PIS.



WAN WIK BIHAIN....

ATING OL PIS
I REBI NAU.
MI GO TOKIM
MARIA.



HEY, YU MEKIM
PINS. NA YU WASIM
OL PIS LONG
SOLWARA TU?

YES!
HAUS BILONG DRAIM PIS
I STAP ANAMIT LONG
WANPELA DIWAI. LONG
WANEM, BIKPELA HAT
BAI PAIIM PIS.

KAUNSI LA TRAIM
C.P. P. A. T. H.
P.O. BOX 6699
BOROKO
N.C.D.

Baim Olpela Mani

WANPELA BIKPELA BISNIS BILONG BAIM KOIN MANI

Mipela i laik baim ol silva koin mani bilong Australia bilong bipo yet i kam inap long 1966. Na tu mipela i laik baim Niugini silings na ol 50 sens Australia mani no gat kona long en ol i wokim long yia 1966.

Mipela bai baim olsem:-

- K1 long ol florin (tu siling).
- 50 toea long ol siling (wan siling) Australian.
- K1 long Niugini siling.

Mipela bai stap long ol dispela ples hia stat long 10 klok moning i go inap long 6 klok apinun.

LAE	Nail Komyuniti Senta	Mas de 28 na 29	423229
WAU	Wau L. G. Kaunsil Samba	Mas de 31	
BULOLO	Bulolo L.G. Kaunsil Samba	Mas de 31	
KAINANTU	Kainantu L.G. Kaunsil Samba	Epril de 2	
FINSCHAFEN	Finschafen L.G. Kaunsil Samba	Epril de 3	
KANDRIAN	Kandrian L.G. Kaunsil Samba	Epril de 7	
KIMBE	W.N.B. Provinsal Gavman Samba	Epril de 9	935001
RABAU	Ascot Hotel Konferens Rum	Epril de 11	922111
KOKOPO	Distrik Opis, Kokopo	Epril de 12	
KAVIENG	Provinsal Gavman Esempli Hol	Epril de 14	942199
BUKA	Kubu Lodge	Epril de 16	
KIETA	Kieta L.G. Kaunsil Samba	Epril de 18	956175
PANGUA		Epril de 19	
BUIN	Buin Komyuniti Senta	Epril de 21	
ALOTAU	Provinsal Gavman Esempli Hol	Epril de 24	
POT MOSBI	Davara Hotel, Rum 9.	Epril de 26	212100

SOUTHERN CROSS COIN CENTRE
G.P.O. Box 1200, Brisbane 4001. AUSTRALIA.



CENTRAL PACIFIC



OL MAN BILONG BAIM SKIN PUKPUK
LONG SEPIK

.... Angoram, Ambunti, Aitape, Pagwi,
Green River, Maz River.

Mipela i amamas long tokim yupela olsem, prais bilong skin pukpuk em i gutpela nau. Givim skin pukpuk bilong yu long Wards Air Cargo long Dagua Rot. Em klostu tasol long Haus Kaikai long narapela sait long Wewak But Kaunsil Semba. Ol bai peim mani long salim skin pukpuk bilong yu i go long Mosbi. Ol bai i no inap sasim yu yet long peim balus.

Telipon namba bilong ol: 862990.

Em hia nupela prais bilong olkain skin pukpuk.

GRADES	1	2	3	1	2	3
4/5 wanwan skin	2.30	1.73	1.15	2.30	1.73	1.15
6/7 wanwan ins	2.20	1.65	1.10	2.80	2.10	1.40
8/9 wanwan ins	3.00	2.25	1.50	4.20	3.15	2.10
10/16 wanwan ins	6.00	4.65	3.10	7.20	5.40	3.60
16/20 wanwan ins	5.60	4.42	2.95	6.90	5.18	3.45

Em bai go inap tasol long pinis bilong mun Epril 1980.

ARAPELA PROVINS

Plis givim ol skin pukpuk bilong yupela long wanem opis bilong Wards Air Cargo i stap klostu long yupela.

Madang - Telipon: 822563
Lae - Telipon: 422343
Kieta - Telipon: 956100

Sapos i no gat opis bilong ol i stap klostu long yu, salim ol skin pukpuk bilong yu long dispela adres:

Central Pacific Import/Export,
C/- Wards Air Cargo
Port Moresby.

Telipon namba: 211623 / 211635

Salim i kam long Air Niugini, Talair o Douglas balus. Yu mas salim tu nem na adres bilong yu. No ken lusim tingting long raitim namba bilong olgeta skin pukpuk bilong yu. Na tu, yu mas i gat laisens bilong salim skin pukpuk.

Opis adres bilong mipela, em hia:

Central Pacific Import/Export,
P. O. Box 6699,
Boroko.
Phone: 211623
258625 (a.h)

Yu save long prais bilong ol arapela lain o save baim skin pukpuk tu? Sapos yu save orait salim tok save bilong prais bilong ol i kam long mipela. Olsem bai mipela inap peim prais i antap moa long prais bilong ol. Mipela i save baim planti skin moa long ol arapela lain long PNG.

CENTRAL PACIFIC IMPORT PTY LTD,
P.O. BOX 6699,
BOROKO, N.C.P.



Poto i soim minista bilong ol samting i stap aninit long graun Mista Gabriel Bakani i putim nem pinis long kontrak wantaim ol kampani. Ol i kontrak long kirapim wok kopa long Ok Tedi.

OK Tedi Kirap Nau

Gavman i kontrak pinis wantaim ol kampani long kirapim wok kapa long Ok Tedi.

Dispela wok bai kisim 3,500 wokman long kirapim ol faktori samting. Na wok tru bilong kamapim kopa, bai yusim 2,000 wokman tasol.

Kampani ya yet bai wokim wara pawa long kamapim pawa bilong dispela hap. Ol bai wokim long Ok Menga.

Na ol bai wokim wanpela rot tu. Em bai stat long Tabubil i go long Kiunga na i sut i go stret long ples bilong digim kopa. Longpela bilong dispela rot bai olsem 120 kilomita. Na ol

bai lusim K80,000,000.00 (eti milien kina) long en.

Gavman bilong yumi bai givim K40,000,000 (foti milien kina) long helpim wok bilong rot. Kampani yet bai lusim arapela hap. Na olgeta arapela samting olsem skul, haus sik, na ol haus bilong ol pipel, em kampani yet bai tromoi mani bilong kirapim ol.

pipel. Em long tupela hap wantaim, Kiunga na Pot Mosbi.

Gavman i givim sampela tok lukaut i go long kampani. Namba wan, em long kampani i mas no ken bagarapim ples, taim wok i kirap. Namba tu, em kampani i mas givim trening long ol PNG. Olsem bai ol inap kisim ples bilong ol waitman long mekim ol kain wok. Na las long en, em kampani i mas helpim ol wok bisnis inap gohetim kantri.

Em bai tromoi mani tu bilong kirapim ol samting na ples bilong amamasim ol


Dispela em mak bilong Haus Bilas. Yu bai inap painim long olgeta pilai laplap na bilas laplap. Planti Haus Bilas pilai laplap igat wanpela kain



lain mak bilong em. Tingim, tupela bikpela na tupela liklik wankain lain, wantaim Haus i soim em ol tru laplap bilong Haus Bilas.

TING TING LONG OL GUTPELA TASOL.

EM HAUS NA LAIN MAKMAK




HAUS BILAS IGAT SAMTING BILONG OLGETA LAIN.....

HAUS BiLAS

Sports & Leisurewear for the people

HEB 162

Ami Long Malaysia



Poto i soim Maja S. Maissa wanpela opisa bilong PNG Defens Fos. Maja Maissa i go pinis long Malaysia. Em i namba wantaim PNG Defens Fos i salim wanpela opisa bilong en i go stadi long Malaysia. Am Fos Star Koles. Maja Maissa bai stadi long 12-pela mun long Malaysia.

Saut Pasifik Festival

Ol pipel bilong Federated Stet ov Maikronesia i stat long redio nau ol samting ol bai kisim i kam long Saut Pasifik Festival ov Ats.

Kosrae na Yap i long soim we ol i save toksave pinis long mekim ol spun, soswanem ol samting ol pen, na ol arapela bai kisim i kam. Ol samting bilong kuk. Ol pipel bilong Yap, bai Ol i kolim dispela salim moa, long *65 FWAFAWA. pipel i kam. Ol bai mekim ol singsing na danis bilong ples, na tu bai ol i soim ol kain kain samting bilong tumbuna ol i save mekim. Ol i ting tu long kisim wanpela bikpela kanu bilong ol i kam. Ol pipel bilong Kosrae bai salim 5-pela man i kam

Ol tupela arapela stet, Ponape na Truk i no tokaut yet long wanem samting bai ol i kisim i kam. Dispela bai namba wan taim tru ol pipel bilong Maikronesia i go kamap long wanpela bikpela festival olsem.



Oli Wokim Toktok Bilong Pait

2 Samyuel 15:13 - 17:13

DEVIT I HARIM DISPELA TOK LONG ABSALOM I LAIK KIRAPIM OL MAN LONG RAUSIM EM NA TINGTING BILONG EM I PAS TRU.

OLAMAN, OLSEM WANEM BAI MI INAP PAIT WANTAIM PIKININI BILONG MI YET NA OL PIPEL BILONG MI?

YU NO KEN WARI. OL MAN I LAIK HELPIM YU BAI I KAMAP LONG YU.

ABSALOM BAI I KAM PAIT WANTAIM YUMI HIA, OLSEM NA YUMI MAS RANAWA PASTAIM. TOKIM FAMILI BILONG MI NA OL WOKBOI LONG REDIM OL SAMTING HARIAP NA BAI YUMI LUSIM JERUSALEM.

NA LONG MONINGTAIM TRU DEVIT I KISIM OL MANMERI BILONG EN NA OL I LUSIM BIKTAUN. EM I SANAP NA LUKIM OL MANMERI I BIHAINIM EM OL I ABRUSIM EM NA I GO.

NA OL PRIS I WOKABAUT NAMEL LONG OL NA KARIM BOKIS KONTRAK BILONG GOD I GO.

WET PASTAIM. MASKI KARIM BOKIS KONTRAK I GO. SAPOS GOD I LAIK BAI MI KAM BEK NA LOTU LONG EM GEN LONG PES BILONG BOKIS.

NA LONG OL WAN WAN AUA PLANTI MAN I BIHAINIM DEVIT. TASOL DEVIT I SALIM WANPELA I GO BEK.

YU YET I KING BILONG MI. NA BAI MI HELPIM YU OLSEM NAU YU TOK.

HUSAI, YU INAP HELPIM MI GUT SAPOS YU GO NA WOK WANTAIM ABSALOM. ATING YU KEN PASIM EM BAI EM I NO KEN BIHAINIM TOK BILONG OL MAN I BIN DAUNIM MI.



Komik hia i kamap pinis long buk. Yu inap baim long olgeta Kristen Buk Stua.

Kantri Bilong Yumi

(Long olgeta mun Utula Samana, Provinsal Plena bilong Morobe Provins, bai raitim wanpela stori long Wantok. As bilong dispela stori em long kirapim tingting bilong yumi ol man meri long ol kain kain we long helpim kantri bilong yumi gohet).



Pipel bilong ples Buasom i stap longwe tru, namel long ol maunten bilong Sarawaged, long Morobe Provins.

Wok resis, i save bagarapim wok, na wok i save pundaun.

Ol dispela lain pipel i stap sori na i no gat bikipela developmen long eria bilong ol. I no gat skul na planti pikinini i stap nating.

I gat wanpela Et-Pos i stap. Wanpela Et-Pos Odali, Mr. Masawa i bosim husat ol wantaim i kisim sik ol sua.

Mista Masawa i bin bosim ol lain bilong em long wokim wanpela ples balus nau ol i kolim Buasom.

Ol pipel i yusim han, pik, savol, na wilbaro long wokim dispela ples-balus. Longpela bilong en: 400 mita. Na namel bilong en: 50 mita.

Ol i bin stat long wokim ples-balus long 1970. Na nau, long yia 1980, Februeri 25, Deputi Primia na Provinsal Minista bilong Woks, Mista Mek Singilong, i go na visitim ol dispela pipel na luksave long hatwok bilong ol.

Ol pipel bilong Buasom i soim tru pasin bilong Independens na Self-rilaens. Ol i no wet na krai long Gavman tasol. Ol i no wetim fotnait, na bihain mekim wok. Ol yet, long save bilong ol, na strong bilong ol i kirap na stat long digim na katim arere bilong maunten long wokim ples-balus.

Wokman na pipel i wok bung olsem bai kantri i go het. Planti taim ol wokman, namel long ol yet, na pipel i save wok resis, na kros nabaut. Dispela em i no gutpela pasin.

Na narapela samting tu. Kantri save kamap long strong bilong pipel. Planti pipel bilong yumi, i stap longwe long taun. Sampela maunten i banisim, wara na solwara i brukim ol wan wan. Ol i stap wan wan long ol liklik ples. Ol planti tru na bikipela lain moa. Winim yumi husat i stap long taun, moa long 2 milien. Bun tru bilong kantri em pipel bilong yumi. Planti bilong ol i stap we? Long wanem hap ol stap long en: EM STIA BILONG WOK BILONG GAVMAN. OL YET I GAVMAN!

Mista Masawa, mausman bilong Buasom i bin tok save:—

“... Anutu (God) i wokim yumi olgeta wankain. Olsem tasol, wok bilong developmen i mas wankain long yumi olgeta.”

Tru, tumas, dispela liklik ples-balus, long Buasom em i piksa tru bilong Independens na self-rilaens, Gavman i save toktok tumas long en. Buasom ples-balus, em i kaikai bilong wok-bung na hatwok. Long planti hap bilong PNG, planti pipel long ples i hatwok olsem i stap. Em wok bilong mipela wokman bilong Gavman long wokabout na luksave long hatwok bilong pipel, na stiaim developmen i sut stret long helpim ol.

Sande Lotu

Frank Mihalic

SANDE NAMBA 3 BILONG ISTA

20 Epril 1980 —

Jon 21: 1 — 19.

Stori bilong tude i soim Jisas i wokabout antap long wara long nait. Em i helpim sampela disaipel long pulim pis, na ol i kisim 153 pis olgeta. Na Pita i pulim umben i kam sua. Na Jisas i wokim paia na i sindaun kaikai wantaim ol. Bihain Jisas i tanim long Pita na i askim em tripela taim: sapos em i laikim Jisas tru o nogat...

laikim mi moa long ol dispela?” Sampela man i ting, Jisas i lukim ol bot na umben samting na em i askim Pita, sapos em i laik lusim ol dispela kain wok nau, na kam wok ful taim long wok bilong God. Sampela arapela man i ting, Jisas i lukluk long ol arapela disaipel i sindaun i stap, na i askim Pita sapos em i tru, em i laikim Jisas moa olsem ol dispela arapela? Long wanem, i no longtaim i go pinis na Pita wanpela i bin givim baksait long Jisas? na ol, nogat. Pita i bin mekim olsem tripela taim, olsem nau na Jisas i askim em tripela taim sapos em i laikim Jisas tru o nogat.

Sen Jon i raitim dispela stori. Na sampela man i ting, olgeta taim Sen Jon i rait, em i no raitim stori nating. Nogat. Oltaim em i save haitim sampela kain kain mining insait long tok bilong em. Ol dispela man i lukim dispela stori bilong Pita wantaim sampela aposel i umbenim pis, na ol i ting olsem. Dispela stori em i wanpela tok piksa bilong Sios. Sios em i olsem wanpela bikipela umben. Dispela namba 153 em i namba bilong olgeta kain kain pis i stap long wara. Em i laik tok: olgeta kain kain pipel i save kam insait long sios. Maski long sais bilong ol na kala bilong ol na kantri bilong ol. Sios em i olsem umben inap long kain wantaim. Yu lukim, umben long stori i no bruk, maski em i gat 153 pis insait long en. Na ol man i ting moa olsem: em Pita yet i pulim umben i kam sua. Em i bikos Jisas i bin makim Pita em i hetman bilong lain bilong em, bilong sios bilong em. Na husat i bringim ol pis i go insait long umben? Em Jisas yet. Bipo Jisas i wokabout i kamap, i no gat sampela pis i go insait long umben.

Olgeta wan wan taim, Pita i bekim tok long Jisas, na i yesa long em na Jisas i givim narapela kain wok long em. Namba wan taim i tok: “Orait. Yu givim kaikai long olgeta pikinini sipsip bilong mi.” namba tu taim Jisas i tok: “Orait. Yu was long ol sipsip bilong mi.” Na Pita i yesa long Jisas namba tri taim na nau Jisas i skruim tok i go olsem: “Yu i orait long lukautim ol sipsip bilong mi. Tasol lukaut, dispela wok i no isi. Mi tokim yu nau: bai yu karim bikipela trabel long dispela wok, na bihain bai ol i kilim yu indai long em tasol.”

Pita em gutpela eksampel long yumi. Sampela taim yumi yesa long God, na yumi painim bikipela trabel long dispela. Em i mak bilong gutpela disaipel tru: em i bilipim tok bilong tisa bilong em. Na em i bihainim dispela tok — maski sapos planti arapela i lap long em, na i givim baksait long em, na i kros long em, na i kilim em i dai.

Orait, nau yumi go het long stori, na yumi lukim dispela tripela taim Jisas i askim Pita “Yu laikim mi tru, o nogat.”

Pastaim Jisas i askim Pita olsem: “Yu

Used by permission of the David C. Cook Foundation. Copyright 1973. David C. Cook Publishing Co. All rights reserved.

Rabisman Helpim Ol Gutpela Man

Bipo tru i bin i gat wanpela lain i stap long Wabag. Nem bilong dispela lain i Depau. Ol i stap i go i go, na long wanpela de wanpela man i tok, mi stap nating long ples na mi les. Mi laik go long bus. Em i tok olsem na em i kisim banara na spia samting na i go long bus.

Ol lain Depau i stap, i stap na dispela man i no kam bek. Tripela de i go pinis nau, na wanpela arapela man i go long bus long painim em. Em i go i go na wok long painim, na ol arapela man long ples i wet i stap i stap. Tasol dispela namba tu man tu i no kam bek.

Olsem na arapela man i kirap na i go long traim painim tupela. Ol lain long ples i wet i go i go inap 3-pela de. Na namba 4 man i tok long go traim painim ol narapela man ya. Em go na i no kam bek na i mekim 4-pela man olgeta i no kam bek.

Olsem na olgeta lain Depau i kirap na pasim

tok long go na painim ol dispela 4-pela man. Ol i tokim wanpela man long stap long ples. Dispela man no gat pik o wanpela gutpela samting tru. Em i wanpela rabisman stret. Orait, nau na em i stap na olgeta man ya i go long bus. Em i stap na i wet i painim wanpela mun olgeta. Tasol ol man ya i no kam bek.

Em i stap na i tok long go painim ol man ya. Na dispela rabisman ya i kirap na i go. Em i go i go long bikbus tru, na em i harim singsing i kam long wanpela hap bus. Em i wokabout i go long hap ples we singsing i kam long en. Em i go kamap long hap ya na i lukim planti meri i singsing, toktok, lap na wok long gaden i stap. Man ya lukluk gut tru long ol i stap na em i lukim wanpela naispela meri i stap wantaim ol. Dispela meri i winim stret ol arapela meri i stap ya. Em i lukluk i stap na i lukim ol i wokabout i laik go dring wara.

Em i stap tingting

planti tru long wanem samting bai em i mekim na bai em i kisim dispela meri ya. Em i tingting i go na em i ting long bai em i kamap olsem wanpela natnat na bai em i go insait long bel bilong dispela naispela meri. Em i ran i go hariap long wara we ol meri ya i save kam dring long en. Taim dispela naispela meri i laik kam dring wara nau, natnat i flai hariap tru i go insait long bel bilong meri ya. Meri ya i pilim wanpela samting i stap insait long bel bilong em na em i kirap na i tokim ol arapela meri olsem, wanpela samting i stap insait long bel bilong mi. Em i stap olsem wan mun na em i pilim olsem em i gat pikinini i stap insait long bel bilong em. I stap i go inap 2-pela mun nau na em i karim wanpela pikinini man.

Ol arapela meri i kirap na askim em, yu maritim man we na yu karim pikinini? Meri ya i kirap na tokim ol, mi no maritim wanpela man. Mi karim pikinini nating. I go na pikinini i kamap

bikpela pinis nau na ol i stap. Pikinini ya i lukim planti taro i stap na em i makim wanpela bilong em yet. Em i tokim mama bilong em, taim yupela i kamautim ol taro, orait dispela taro mi makim, em i bilong mi yet.

Ol i stap i go i go na long wanpela de nau ol meri ya i tok long bai tumora ol i kamautim ol taro. Orait, liklik boi ya i kirap na kisim wanpela stik na i go long taro em i makim long en na i stat long brukim graun arere long taro. Em i brukim graun pinis, na em i go bek long haus bilong em. Long moningtaim nau ol i go long kamautim ol taro. Ol i stap kamautim bilong ol na liklik boi ya i go long kamautim taro bilong em. Taim em i kamautim taro, em i lukim ol taro i bruk, bruk i stap na liklik boi ya i hatim bikpela kra i tru. Em i stat long moningtaim i go inap long apinun, taim ol lain i pinis long kamautim taro. Mama bilong em i lukim olsem na em i grisim em i tok, "Yu pinis kra i. Bai mitupela i go long ples bilong mi."

Liklik boi ya i kirap

na i askim em, "Ples bilong yu i stap we?" Mama bilong em i kirap na tokim em, "Papa bilong mi i stap long ples. Na taim mitupela i go long ples bilong mi, bai yu inap lukim papa bilong mi."

Em nau na liklik boi ya i pinisim liklik wok em i bin mekim na i amamas na i ran i go kai-kai taro. Bel bilong em i pulap na em i go slip. Long moningtaim em i kirap na i tokim mama bilong em, "Yu kirap na bai mitupela i go nau long ples bilong yu." Orait, mama bilong em i kirap na i kisim ol samting bilong tupela na tupela i wokabout i go long ples bilong mama. Tupela i go i go na i kamap long ples bilong mama. Na papa bilong meri ya i lukim pikinini na i askim pikinini meri bilong em, "Em pikinini bilong husat?" Meri ya i kirap na i tok, "Em pikinini bilong mi." Papa bilong meri ya i amamas tru.

Ol i stap i go inap olsem 2-pela de na mama bilong boi ya i tokim em, "Yu stap wantaim tumbuna na mi bai go long gaden. Na boi ya i stap wantaim tumbuna

bilong em long ples. Tupela i stap na tumbuna bilong em i tokim em olsem, "Yu stap pilai pilai tasol long hia. Na yu no ken i go long baksait bilong haus." Dispela tok i mekim liklik boi ya i tingting planti. Orait, em i pilai pilai i stap na em i trikim tumbuna bilong em na em i go long baksait bilong haus.



haus bilong lapun man ya na kilim em.

Taim lapun man i dai, dua bilong haus we ol man i stap long en ya i op. Na ol man i kamaut long haus. Long dispela taim tu liklik boi ya i tanim gen olsem dispela man bilong ples.

Ol man ya i lukim pes bilong em na sampela i amamas na sampela i kra i. Ol i ting bai ol i stap inap taim ol i dai, tasol dispela man ya i kam na helpim ol. Bihain ol i go bek long ples bilong ol na lukim ol lain meri wantaim pikinini bilong ol long ples.

Dispela stori i makim olsem long bipo dispela tewel i laik long pinisim olgeta man tasol rabisman ya i bin trikim tewelman ya olsem na i gat pipel yet.

John Yongapen Taun, Wabag, Enga Provins.


TRY YOUR LUCK

HURRY

YU LAIK WINIM WANPELA REDIO KASET! ORAIT, BAIM WANPELA TIN NESCAFÉ O IDEAL MILK.

RAITIM NEM NA ADRES BILONG YU LONG HAP PEPA I PAS LONG TIN NESCAFÉ O IDEAL MILK. PUTIM DISPELA PEPA INSAIT LONG WANPELA SKINPAS NA SALIM I KAM LONG:-

NESTLE KAMPANI, P.O. BOX 1359, BOROKO PORT MORESBY.





GOOD LUCK
long



HEB 151

NESCAFÉ AND Ideal MILK



BIABIA



TOK SAVE

Toksave i go stret long ol pipel o pasindia flai long Pot Mosbi na i go antap long Goroka long 29 de bilong mun Janueri 1980. Long 6 klok morning flait. (Balus). Mi wanpela pasindia bilong dispela sem flait tasol ol trefik i rausim mi o putim mi long wet lis, na mi i stap long Mosbi. Tasol ol i salim 3-pela bek (2- (2-pela bilum na 1-pela han bek) bilong mi i go pinis long Gcrocka long dispela Balus. Olsem na taim mi kamap long Goroka mi bin lukim 2-pela bilum tasol. Na mi no lukim han bek we mi bin pulimapim planti senis, tawel, kaset na poto album bilong mi. Olsem na mi putim dispela tok save i go stret long yupela ol pasindia kisim balus long Mosbi na i kam long Goroka.

Plis yu husat man kisim dispela braunpela han bek yu kisim olgeta samting na plis slaim bek olgeta kaset na poto Album we mi bin pulimapim long en. Mr. Solomon W. Linihafa, P.O. Box 5703, BOROKO. N.C.P.

Salim tok save i kam long:

**TOK SAVE,
BOX 1982,
BOROKO.**

Stretim Tok

Namba 71

1	2	3	4	5	6
7				8	
9	10		11		12
13		14			
	15			16	17
18					
	19				

Namba 71 - Ol taun:

Stret: 1. Ples bilong Yunivesiti bilong PNG. 7. Taun long Sepik Provins. 9. Unaitet Nesen Ogenaisensen. 11. Wanpela buk o niuspepa yu ken . . . 13. Hap bilong Pot Mosbi Siti . 15. Nem bilong man. 18. Taun long Milen Be Provins. 19. Taun i stap klostu long Wau.

Daun: 1. Taun klostu long Bulolo. 2. Sotwe long raitim 'Australia-Niu Silan. 3. Olsem wokabaut. 4. Taun long Isten Hailans. 5. Klap bilong planti kantri. 6. Sotwe long raitim 'Intenesenel Maket'. 8. Em narakain tok long en 'Erik'. 10. Nem bilong meri. 12. Nem bilong Itali man. 13. Man i save wok oltaim, em. . . 14. Bikpela riva long PNG. 16. Provins bilong PNG. 17. PNG Balus kampani.

Namba 70: Ansa Bilong Las wik:

Daun: 1. Amerika. 2. Fopela. 3. Ruru. 4. Isi. 5. Kalsa. 6. Aua. 7. Is. 12. Saina. 13. Iso. 14. Trik. 18. Li.

Toksave

Stret: 1. Afrika. 8. USA. 9. US. 10. Epril. 11. As. 13. Ista. 15. Lisa. 16. Ri. 17. Karolin. 19. Amerika.

KAS BILONG ABA NA KUSAK

Aba givim
Tarika

Boksa bilong Australia na Fiji i no inap tru long boksa bilong yumi, Aba na Tigerman Kamanek. Long las wik Fraiden nait Willie Tarika bilong Fiji na Steve (Sparrow) Freeman bilong Australia i kisim faim Tarika i laik trai long winim Junia Lait Weit Komonwelt Taitel long Aba long dispela pait. Kusak wantaim Freeman i pait nating.

Long dispela pait Aba i winim Tarika long points na em i holim yet taitel bilong em olsem Komonwelt Junia Lait Weit Sempion. Aba wantaim Tarika i pait i go inap 15 raun olgeta. Aba i smat moa long dispela pait na Willie i luk olsem em i lain yet long boks. Aba i kisim 150 points na Tarika i kisim 146 points tasol.

Bihain long pait Aba i tok em i no painim wangepela trabel long pait wantaim Tarika. Pait i isi tru na mi no painim hat long paitim moa yet Tarika. Em i tok em i amamas long holim yet dispela taitel bilong em.

Pait bilong Tigerman na Freeman i mekim planti sapota bilong yumi kros stret long dispela boksa bilong Australia. Em i no bihainim lo bilong boks.


Long namba tu raun Freeman i kalap kalap i stap klostu long rop na Tigerman i tainim gut tru na givim wangepela han i go long em na em i pundaun i go autsait long graun. Em i pundaun nogut tru. Dispela i mekim em kros tru na em i ron spid tru i kam antap i laik go pait moa. Dokta i laik sekim em tasol em i les.

Kusak i wok long paitim em strong tru na planti taim Freeman i wok long paitim em strong tru na palnti taim Freeman i wok long traim holimpasim Kusak na tromoi em long graun. Dispela i no we bilong boks. Refri i no mekim wangepela samting taim Freeman i mekim dispela ol rabis pasin inap long namba 5 raun. Refri i ting em i mas stopim dispela pait.

Long namba 5 raun Freeman i holimpaim het bilong Tigerman long han na i wok long bamim het bilong em antap long het bilong Tigerman.

Refri i tok dispela em i no we bilong boks na em i go apim han bilong Tigerman na mekim em wina bilong dispela pait. Dispela we em Freeman i wokim inap givim blut long arapela boksa.

Ben Kasanda




Tigerman givim wan long Freeman

Poto — Peter Luwenstein

PINE-O-CLEEN


Rausim ol jerm long haus bilong yu



Jerm i save kamap long olgeta chap. As ples tru bilong em haus kuk.



Ol baret na hul inap kamapim sik. Kapsatim liklik Pine o Klin bai yu mekim save long ol pries.



Ol toilet tu yu ken klirin long Pine o Klin. Kapsatim liklik long toilet na i stap.



Jerm i stap long olgeta ples doti. Klirin haus long Pine o Klin. Klirin plus long haus kuk na toilet long Pine o Klin. Putim Pine o Klin long baket wata na klirin plus Pine o Klin i save klirin indai ol kam kam pries long haus.



Yu ken kisim long olgeta bikpela stua na tred stua

Hara Kap

Raun 5
Sarere 29 Mas.

GRUP 8		GRUP 7.
BOROKO 1 SAT.		BOROKO 2 SAT.
Tokenen vs Batisalem	12.45	Frze vs Haus Bilas
Paramania vs Cape Nelson	1.55	Maegin II vs Dagenava
Maegin I vs VRFL	3.05	Waiya vs PWD.
GRUP 3.		GRUP 6.
DIFENS SAT.		UNIVESITI SAT.
Balopa vs Guria	12.45	Jevaha vs Uni
Amoana vs A.N.G.	1.55	Mannah vs Franki
Ali Unaitet vs Baboka	3.05	Kadaka vs Papane

Sande 30 Mas

GRUP 4.		GRUP 5.
BOROKO 1 SAN.		BOROKO 2 SAN.
Manolos vs Illimo	12.45	Togelu vs Capewood
San Mig vs Sunam	1.55	Kiriwina vs Lut. Yut I
Kunta vs Lorangau	3.05	G'Enough Is vs G.F.C.
GRUP 2.		GRUP 1.
DIFENS SAN.		UNIVESITI SAN.
Otolam vs Luteran Yut II	12.45	KE vs Bun Bun
Mopi vs Kapit	1.55	Blue Kumul vs Rabaraba.
G.F.C. II vs KS.	3.05	Liverpool vs Solo.

Hara Kap Nokaut bai stat long Ista Sarere, 5th Epril. Wanem tupela tim i stap las long wan grup, bai i no inap stap insait long dispela Nokaut.



Ol tim bilong Grup 1 vs Ol tim bilong Grup 3.
Ol tim bilong Grup 2 vs Ol tim bilong Grup 4.
Ol tim bilong Grup 5 vs Ol tim bilong Grup 7.
Ol tim bilong Grup 6 vs Ol tim bilong Grup 8.

Wanem ol tim i laik pilaim gen bilong ol long Gut Fraide, tok save long Don Poundford. Telipon namba bilong em i, 273541. Ol tim i ken mekim olsem long sotim namba bilong ol pilai ol bai mekim long Sarere.

I gat 32 tim olgeta. Long Sarere bai gat 16 gem olgeta i kamap long Bisini Pered Pilai Graun.

 **Wantok
Spot**

Aba Enitaim



Sempion, John Aba i surik i kam autsait long abrusim lephan bilong Willie Tarika. Tarika i pait gut tasol em i no klewa tumas long winim Aba.

Willie Tarika i painim taim stret na i laik hait taim Aba i hamaim lep-raik long em.

Poto — Peter Lowenstein

AIR NIUGINI

THE NATIONAL AIRLINE OF PAPUA NEW GUINEA

HELPIM KANTRI GOHET



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.